

Dia 5 di Juni 2006 ta Dia Mundial di Medio Ambiente

Maneho dirigi ariba proteccion ambiental y preservacion di nos naturaleza ta sostene nos capacidad pa competi ariba mercado turistico

Segun presidente di Fundacion Accion Ambiental Aruba (FAA), sr. Marcos Marcos Bislip

ORANJESTAD – Den cuadro di celebracion di Dia Mundial di medio Ambiente sr. Marcos Bislip, Presidente Fundacion Accion Ambiental ta haci un disertacion amplio riba e dia tan special aki pa tur defensor y amante di medio ambiente. E ta bisa asina:

Dia 5 di Juni 2006 a ser celebra 34 anja pasa cu Dia Mundial di Medio Ambiente awor do reconoci oficialmente. Tabata ariba Dia 5 di Juni 1972 a tuma lugar na Stockholm, Sweden, apertura di e conferencia di Nacionnan Uni tocante Ambiente Humano. Na e conferencia aki e relacion entre desaroy economico y e impacto ambiental a keda reconoci claramente. Ta considera e hecho aki di tal importancia cu e fecha di Dia 5 di Juni ta wordo observa mundialmente como Dia Mundial di Medio Ambiente. Maneho di medio ambiente ta un tereno masha amplio y cu hopi aspecto ariba hopi tereno profesional incluyendo aspectonan ecologico, climatologico, economico, salubridad, demografico y social. E aspecto di tratadonan internacional ta importante como cu nos mester tene cuenta cu hopi problema ambiental no ta limita nan mes na frontera di un pais of nacion, pero mas bien tin un caracter regional y hasta mundial. Esaki ta hopi cla den caso di contaminacion di aire y di awa, pues contaminacion di atmosfera y hydrofeer. Circulacion di aire y corrientenan den lama por transporta productonan toxico pa distancianan hopi grandi, causando contaminacion y polucion transfrontera. Pesey proteccion di nos tera, nos lama y nos aire ta un necesidad tanto for di bista di salubridad publico como for di punto di bista di nos desaroy economico. Pues un maneho dirigi ariba proteccion ambiental y preservacion di nos naturaleza ta sostene nos capacidad pa competi ariba mercado turistico, tambe ariba un termino largo. Proteccion di nos costanan contra derame di petrolio ta un necesidad grandi. Pa loke ta rosamento di tereno y kibramento di piedra na areanan proteha pa naturaleza mester wordo para y prohibi mas pronto cu ta posibel.

RECHAZA, RE-USA, REDUCI Y RECICLA

Alaves ta existi un cambio di mentalidad di e publico en general pa cu cuida di nos medio ambiente, pa asina ta conciente di e problemanan cu ta existi.

E principio ariba cual e maneho pa cu AFVAL mester ta basa, ta loke ta wordo yama Rechaza, Re-usa, Reduci y Recicla.

Rechaza: esta proteha e medio ambiente door di no usa productonan cu ta malo pa e medio ambiente, pero solamente productonan cu ta aceptabel ecologicamente.

Re-usa: pa asina prolonga e bida di e productonan cu nos ta usa.

Reduci: e consumo di articulon y productonan cu ta fuentenan di contaminacion. Recicla: pa transforma e material di desperdicio den material prima.

Aparte di importancia di e maneho ambiental y di "ruimtelijke ontwikkeling", e maneho pa cu vivienda popular tin un exceso di poblacion masha grandi.

Relaciona cu esaki ta na su lugar pa menciona cu den Agenda 21, cu awor do aproba na e "United Nations Conference on Environment and Development" (UNCED) na Rio di Janeiro na luna di Juni 1992, e aspectonan di vivienda, planificacion especial y medio ambiente ta wordo considera elementonan integral pa cu un maneho sano ariba tereno di medio ambiente y desaroy sostenibel di islanan chiquito, cu a tuma lugar den luna di April 1994 y organiza pa Nacionnan Uni.

Nos organizacion (institucion di vital importancia pa cu maneho di medio ambiente na Aruba) Fundacion Accion Ambiental Aruba a haci un entrega di un documento oficial esta un rapport ariba e problemanan ambiental di nos pais y tambe recomendacion y solucionnan pa e problemanan existente.

RECOMENDACIONNAN
Den calidad como presidente di e organizacion (institucion) Fundacion Accion Ambiental Sr. Marcos Bislip kier a trece algun recomendacionnan na e comunidad.

1. No tira carbon of sushi ariba nos beachnan.

2. No tira stoel, matras, pida palo y otro materialnan den lama of den mondi.

Alaves no tira auto, asbest, caha di softdrink, of otro materialnan na sitionan cu ta proteha pa naturaleza.

3. No destrui nos naturaleza, e

ta parti di nos medio ambiente. E ta causa erosion y ta forma lugarnan seco, manera woestijn sin bida.

4. No dera materialnan chimico, radio-activo, metal y materialnan toxico bou di tera.

5. No benta sushi ariba caminda of den mondi.

6. No descarga of tira azeta den riool pero hibe na lugarnan cu ta collecta azeta.

7. No kima sushi, e ta malo pa bo salud y salud di otronan.

8. Ora muffler di bo auto ta kibra cambie of dreche mas pronto cu ta posibel.

9. No tira sushi unda gobierno no a designa como dump.

10. No destrui nos corallan nan ta parti di nos atraccionnan Turistico.

Tambe cuida nos Quebanan nan ta parti nan historico di nos pais.

Na Aruba undi nos problemanan mas grandi ta respet pa otro.

Ainda Gobiernonan di tanto partido MEP y AVP te cu awe semper a impone y dicta ariba maneho pa cu medio ambiente y no a duna un participacion real na instancia no-gubernamental di medio ambiente aki na Aruba.

Te ainda den un Siglo Nobo nos na Aruba no conoce realmente loke ta desaroy sostenibel menos pa loke ta un participacion real.

Te awe gobiernonoporspica pa kiko nan a cera e departamento di VROM y dicen

a core cu dos experto local. Awe cu VROM ta cera nos por mira un desaster di mas grandi den historia pa cu maneho di nos medio ambiente.

Tabata Anja pasa den luna di April cu nos a haci un publicacion relaciona cu e ceramento di e dump na Palo Marga y ki consecuencia esaki ta bai tin y cu e cobranza di Alf 10,- lo trece un problema grandi pa cu nos medio ambiente na unda cu hopi ta esnan cu lo bai tira sushi den mondanan aki na Aruba treciendo un desaster grandi pa cu nos naturaleza y salubridad publico, pero lastimamente gobiernon no a tuma nos serio.

Awe nos por mira tur caminda sushinan tira den tur mondanan y areanan di naturaleza como tambe den areanan habita. Fundacion Accion Ambiental Aruba anja pasa den luna di September y Augustus a laga haci un investigacion di tur e areanan contaminan pa sushi y mester bisa cu e situacion a kibra tur record den historia y nada ta wordo haci pa mehora e situacion di sushi aki na Aruba.

Na varios ocacion Accion Ambiental a informa

y a publica hunto cu prensa local pa cu e problema grandi di sushi na Aruba pero manera semper e ta wordo ignora. Dia pa Dia Aruba ta birando mas sushi y nada ta wordo haci pa autoridadnan di Serlimar. Instancianan cu nos por compronde pa nan ta Polisan Ambiental y Sr. Marlon Pieters City Inspector, nan no por haci nada paso no tin suficiente ley pa castiga esnan cu ta haci e danjonan aki y no tin ley pa introduci borchinan di prohibicionnan. E mesun problema pa cu e brote di Dengue tabata e cantidad di sushinan

cu te ainda tin tira den tur mondi, esakinan a sirbi tambe como criadera pa Dengue.

Otro problema grandi cu nos ta confronta ta e problema di sobre poblacion y e cantidad di autonan cu tin na nos isla cu ta produci asina tanto gasnan carbon dioxido cu ta afecta nos atmosfera haciendo danjo na e Capa di Ozon y sin menciona e gasnan cu e refineria Valero y e compania cu ta produci awa y coriente esta WEB ta causa na nos atmosfera.

Recientemente Fundacion Accion Ambiental Aruba a bin hanja sa for di bon fuente cu tanto e refineria Valero y e compania cu ta produci awa y coriente esta WEB no ta mucho interesa den reduccion di e gasnan cu ta sali for di nan compania.

Mientras cu durante un lectura duna na Centro di Barrio Playa Pabou Dia 23 di Mei cu a pasa organiza pa Aruba Junior Chamber na unda ehecutivonan di Elmar N.V. y WEB Aruba N.V. a duna un presentacion, na unda un representante di nos organizacion tabata presente, a bin sali na cla for di ehecutivonan di WEB Aruba N.V. y Elmar N.V. cu energia alternativo of renobabel manera energia solar, energia di biento y otro energianan alternativo of renobabel pa e ehecutivonan di tanto WEB Aruba N.V. y Elmar N.V. no ta rendibel. Fundacion Accion Ambiental a keda hopi sorprendi pa e declaracionnan aki y awor por compronde cu ni Valero, ni WEB, ni Elmar y ni Gobierno di Aruba no ta respetando e acuerdonan internacional relaciona cu reduccion di gasnan y pa introduci energia alternativo of



renobabel na Aruba. Mientras cu presidente norteamericano George W. BUSH a caba di produci tres rapport relaciona cu energia alternativo of renobabel y cu dentro di poco gobierno di merca lo bai usa mas energia di gas, energia solar y biento y na e mesun momento ta studiando e introduccion di energia biomass.

Fundacion Accion Ambiental ta dispone di tur tres rapport y ta traha den estrecho cooperacion cu instancianan importante manera departamento di energia di estados unidos y tur otro instancianan tanto di gobierno y no di gobierno a nivel mundial pa cual nos organizacion ta miembro tambe. Mientras cu mundo ta avansa, na Aruba nos ta kedando 30 pa 40 Anja atrasa pa motibo di ignorancia y falta di conocimiento pa cu e politica y tecnologia relaciona cu energia alternativo y renobabel a nivel mundial.

Ainda den e siglo nobo aki nos tin Ingenieronan y Politiconan cu ainda ta biba den epoca di piedra. Nos di Fundacion Accion Ambiental ta dispone di expertonan local y internacional cu si ta kere den desaroy sostenibel y den avance tecnologico y tambe den solucion pae calentamento di nos mundo. Energia Alternativo y Renobabel ta pa reduci of elimina e produccion di gasnan cu ta wordo produci pa plantanan cu ta genera awa y coriente como tambe refinerianan petrolero, pa asina elimina e danjo na nos Capa di Ozon cu ta causando e calentamento na nos Planeta Tera. Te akinan e comunicado di prensa di sr. Marcos Bislip, Presidente Fundacion Accion Ambiental, enconexon cu conmemoracion di Dia Mundial di Medio Ambiente.